



ЕКІЖАҚТЫ БАЙЛАНЫСТЫҢ ЖАҢА БЕЛЕСІ

Мемлекет басшысы Қасым-Жомарт Тоқаев пен Корея Республикасының Президенті Юн Сок Ёль кеңейтілген құрамда келіссөз жүргізді. Екі ел делегацияларының қатысуымен өткен келіссөз барысында еліміздің Президенті Юн Сок Ёльдің Қазақстанға жасаған алғашқы мемлекеттік сапарын тарихи оқиға деп бағалады. Сондай-ақ бүгінгі келіссөздер қазақ-корей ықпалдастығының аясын кеңейтіп, екіжақты байланысты жаңа белеске көтеретінін айтты.

Мемлекет басшысының пікірінше, Оңтүстік Корея жаһандық ауқымдағы нағыз экономикалық және технологиялық локомотивке айналды. Ал әлемге әйгілі корей корпорациялары халықаралық аренада елдің «негізгі жаһандық мемлекет» ретіндегі позициясын ілгерілетуге елеулі үлес қосып келеді. Сонымен қатар Қасым-Жомарт Тоқаев екіжақты қатынастарды дамыту мәселелеріне тоқталды. Оның айтуынша, Сеул – Қазақстанның Азия-Тынық мұхиты аймағындағы маңызды стратегиялық серіктестерінің бірі. Корея сыртқы сауда айналымы бойынша төртінші орында және еліміздегі ең ірі шетелдік инвесторлардың ондығына кіреді.

Мемлекет басшысы Қазақстан мен Кореяның отыз жылдан астам уақыт ішінде жоғары деңгейдегі саяси диалогқа қол жеткізгенін, табысты экономикалық ынтымақтастықты және берік гуманитарлық байланыстарды жолға қойғанын атап өтті. Екі ел парламентарлық, үкіметаралық, ведомстволарлық деңгейде және басқа да түрлі салаларда ықпалдастық орнатқан. Іскерлік кеңес

пен Сауда-экономикалық және ғылыми-техникалық ынтымақтастық жөніндегі үкіметаралық комиссия табысты жұмыс істеп жатыр.

Қасым-Жомарт Тоқаев екі ел кәсіпкерлері арасындағы тығыз қарым-қатынасты жолға қою ісінде тұрақты байланыстар аса маңызды рөл атқаратынына тоқталды. Сондай-ақ Қазақстанда Оңтүстік Кореяның капиталы бар 700-ден астам компания жемісті жұмыс істеп жатқанын ерекше атап өтті. Бұдан бөлек, тараптар мәдени-гуманитарлық байланыстарды дамыту мәселесіне назар аударды.

– Қазақстанда тұратын 120 мың этникалық корей ұлтының өкілдері екі ел арасындағы қатынастарды нығайтуда маңызды рөл атқарады және оған өлшеусіз үлес қосады. Кореяда білім алып жатқан мыңнан астам қазақстандық жас мемлекеттер арасындағы «достықтың алтын көпірі» саналады, – деді Қасым-Жомарт Тоқаев.

(Жалғасы 2-бетте)



НАРЫҚ КӨКЖИЕГІ КЕҢЕЙЕ ТҮСПЕК

Қазақстан мен Корея арасындағы экономикалық қарым-қатынас жаңа бағытта өрбиді. Биыл он үшінші рет өткен қазақ-корей бизнес-форумына Оңтүстік Кореядан келген 50-ге жуық ірі компания өкілдері қатысты. Бұл іскерлік басқосудың бір ерекшелігі – оған корей елінің болашағынан үлкен үміт күттіретін стартап жобалары да келіп отыр. Шара барысында жалпы құны \$430 млн асатын 23 екіжақты құжатқа қол қойылды. Мемлекет басшысы екі ел арасындағы сауда-экономикалық ынтымақтастықтың ең перспективті бағыттарына тоқталды.

Мемлекет басшысы атап өткендей, Корея Республикасы Қазақстанның ең ірі инвестициялық және сауда серіктестерінің бестігіне кіреді.

– Корея Республикасы – Қазақстанның бес ірі инвестициялық және сауда серіктесінің бірі. Кореядан экономикамызға тікелей тартылатын инвестиция көлемі он миллиард долларға жуықтады. Ал өзара сауда айналымы алты миллиард долларды құрады. Қазақстан Корея Республикасының Орталық Азия аймағындағы негізгі сауда-экономикалық серіктесі ретінде өз позициясын нығайтуға ниетті. Сарапшылардың болжамына сәйкес, биыл әлемдік жалпы ішкі өнімнің 60 пайыз өсімін Азия қамтамасыз етеді. Бұл ретте Оңтүстік Корея «Азия ренессансында» ең маңызды рөл атқаратыны сөзсіз, – деді Президент.

Қасым-Жомарт Тоқаев елімізде жаңа экономикалық бағдардың дәйекті жүзеге асырылып

жатқаны, инвесторларға қолайлы жағдай жасау шараларына баса мән берілетіні туралы айтты. Оның пікірінше, жер қойнауын пайдалану және өнеркәсіп сияқты стратегиялық мәні зор салалар Қазақстан мен Корея экономикалары кооперациясының маңызды бағыттары саналады.

– Мұнай-газ саласына Оңтүстік Корея технологияларын толыққанды трансферт жасау, сондай-ақ заманауи құрал-жабдықтар мен қосалқы бөлшектер өндірісін жолға қою біз үшін маңызды. Теңіз, Қашаған және Қарашығанақ секілді ірі мұнай-газ кен орындарында өндірісті кеңейтуге бағытталған жобалардың жүзеге асырылып жатқанын ескерсек, мұның өзектілігі арта түседі, – деді Президент.

(Жалғасы 2-бетте)

ПАРЛАМЕНТ ПАЛАТАЛАРЫНЫҢ БІРЛЕСКЕН ОТЫРЫСЫН ШАҚЫРУ ТУРАЛЫ ӨКІМГЕ ҚОЛ ҚОЙДЫ

Мәжіліс Төрағасы Ерлан Қожанов Парламент Палаталарының бірлескен отырысын шақыру туралы Өкімге қол қойды.

«Қазақстан Республикасы Конституциясының 58-бабы 4-тармағының 2) тармақшасына сәйкес Қазақстан Республикасы Парламенті Палаталарының бірлескен отырысы 2024 жылғы 14 маусымда сағат 09.30-да Астана қаласында шақырылсын», – деп жазылған Өкім мәтінінде.



РИЕЛТОРЛЫҚ САЛА

Қызметі мемлекет тарапынан реттелмейтін риелторлардың халыққа тізесі батып барады. Құзырлы органдардың, депутаттардың, сарапшылардың айтуынша, олар аярылық жасап, елді алдайды, билігін пайдаланып, белден басады. Сондықтан Ұлттық экономика министрлігі бұл салада реформа бастауды ұсынып отыр. Мәселен, оларды адвокат, нотариус сияқты өзін-өзі реттеуші ортақ палаталарға, бірлестіктерге біріктіріп, солар тарапынан бақылау орнату мәселесі пысықталады.

РЕТТЕУДІ ҚАЖЕТ ЕТЕДІ



» 4

ВАНДАЛИЗММЕН КҮРЕС ЖАЛҒАСЫН ТАПТЫ



4
БЕТ

АЛТЫ МЕРГЕН ОЛИМПИАДАДА БАҚ СЫНАЙДЫ



8
БЕТ

ҒЫЛЫМ ҚУҒАН ЕЛ ОЗАДЫ

Өткенде ғана Мемлекет басшысы Қасым-Жомарт Тоқаев Алматыдағы Ғылым ордасында өткен жиында біраз мәселе көтерді. Еліміздегі ғалымдарға қойылатын талап пен дамытуды қажет ететін басым бағыттарды атап өтті. Осы орайда «Қазақстандағы ғылымның даму деңгейі қандай?» деген сауалдың жауабын іздеп көрген едік.

МЕМЛЕКЕТ ҚОЛДАУ КӨРСЕТЕДІ

Кейінгі жылдары мемлекет ғылымды дамытуға ерекше ден қоя бастады. Аталған салаға бөлінетін қаражат жыл сайын ұлғайып келеді. Президент жанындағы Ғылым және технология жөніндегі ұлттық кеңес құрылды. Ұлттық ғылым академиясына «Президент жанындағы» мәртебесі берілді.

Бүгінде елімізде 22 456 ғылыми қызметкер бар. Зерттеушілердің 37 пайызының ғылыми немесе академиялық дәрежесі бар – 1 743 ғылым докторы, 3 945 ғылым кандидаты, 2 460 PhD докторы және өз саласы бойынша 96 доктор саналады. 414 ұйым ғылыми зерттеулер мен әзірлемелерді орындаумен айналысады. Кейінгі жылдары ғалымдардың жалақысы екі есеге ұлғайды.

Білікті маман әзірлеуге бағытталған грант көлемі соңғы жылдары 1,5 есеге артты. Қазір елімізде әлемнің беделді 12 университетінің филиалы бар. Президенттің тапсырмасына сай, алдағы уақытта тағы бірнеше білім ордасының филиалы ашылады. Таяуда Қ.Тоқаев Сингапурге барып, ондағы жоғары оқу орындарының басшыларымен кездескен-ді. Келіссөздер нәтижесінде ел мамандарының Сингапурде дәріс алуына жағдай жасалады.

» 6



